

四庫全書

集部

欽定四庫全書

集部

王忠文集

目錄
卷一

詳校官鴻臚寺少卿臣梁景陽

中書臣劉源溥覆勘

總校官中書臣朱

鈐

校對官學正臣常

循

謄錄副榜臣施

堂

欽定四庫全書

集部六

王忠文集目錄

別集類五明

卷一

賦

四言詩

五言古詩

卷一

五言古詩

五言律

五言排律

七言古詩

七言律

七言排律

卷三

七言絕

歌

曲

卷四

論

辯

原

卷五

序

卷六

序

卷七

序

卷八

記

卷九

記

卷十

記

卷十一

記

卷十二

詔

制

詰

表

檄

銘

卷十三

擬

卷十四

擬

操

卷十五

議

贊

頌

箴

卷十六

碑

書

卷十七

題跋

辭

卷十八

雜著

卷十九

雜著

卷二十

雜著

卷二十一

傳

卷二十二

傳

字說

行狀

卷二十三

哀辭

誄

祭文

墓誌銘

卷二十四

墓誌銘

墓表

臣等謹案王忠文集二十四卷明王禕撰禕

字子充義烏人官至翰林待制使雲南梁王

殉節死事迹具明史本傳是集前十二卷舊
題鄱陽劉傑編輯廬陵劉同校正十三卷以
下則編輯者改題同校正者改題傑意二人
各刊其半歟傑即正統六年為義烏丞時表
禕之忠於朝得贈官賜謚者也禕有華川前
集十卷後集十卷此本卷端胡翰胡行簡二
序皆為前集作宋濂蘇伯衡二序皆為後集
作其楊士奇一序則為此本作也禕師黃潛

友宋濂學有淵源故其文醇朴闕肆有宋人軌範濂序稱其文凡三變初年所作幅程廣而運化宏壯年出游之後氣象益以沉雄暨四十以後乃渾然天成條理不爽可謂知禕之深矣集中多代擬古人之作蓋學文之時設身處地以殫揣摩之功者非游戲筆也乾隆四十三年三月恭校上

總纂官臣紀昀臣陸錫熊臣孫士毅

總校官 臣陸費墀

王忠文集原序

古之為士者文行皆備而必行為之本故三代以上文最高古而無以文名者其所本不係於文也秦漢以來士始有專以文名如或違道畔義君子不道也楊子雲劇秦美新是已若斷斷焉發於忠君愛親之誠讀之使人感激奮發希慕之不置雖去之千載猶目前然者諸葛武侯之出師李令伯之陳情是已近數百年來士多喜讀韓文公歐陽文忠公蘇文忠公之文要皆本其立

朝大節炳炳焉有以振發人心者也我國家隆興之初
金華宋公景濂王公子充相繼入翰林持文柄時詔修
元史二公皆任總裁巋然一代之望也已而王公以翰
林待制奉命招諭雲南之未下者至則以天命人心從
違吉凶之道反覆開諭其人初已嚮服會有倔彊拒命
者公奮義死之後十年天兵下雲南王公死事始暴白
於中朝然旌褒之澤未及也皇上嗣大統之五年義烏
丞劉傑白其忠于朝下誦於衆而信詔贈翰林學士奉

議大夫賜謚忠文於是距公之死七十年矣命下之日
輿論欣快蓋忠孝人人性分所固有者為天下者必表
章之以正人心善俗化治道所係也其或晦於前而必
彰於後者天道顯忠佑善雖久遠必不爽也傑又輯王
公平素之文將刻以傳屬予序公之文蚤有聲於勝國
時既入國朝首見用於朝廷於郊廟宋學士諸公序之
詳矣予特錄其死節事以著其文之本也嗚呼王公之
死以使命蓋與唐顏魯公同魯公之書傳於後雖片楮

尺素人得之千金不易矧文者至理要道之所寓乎其
傳無疑也公名禕義烏人死年五十有二傑所建白十
事採用其九論公死事在焉其亦可為達於政體者矣
廬陵楊士奇序

王忠文前集原序

吾婺以學術稱者在至元中則金公吉甫胡公汲仲為之倡汲仲之後則許公益之柳公道傳黃公晉卿吳公正傳胡公古愚卓立並起而張公子長陳公君采王公叔善又皆彬彬和附於下當南北混一方地數萬里人物不可以億計而言文獻之緒者以婺為首稱則是數君子實表礪焉逮至正以後黃公猶秉筆居中朝於是淪謝殆盡而得吾子充紹其聲光子充黃公里中子也

嘗負其所有涉濤江游吳中者久之又自吳踰淮沂黃河而北達于燕趙留輦轂之下久之嘗用薦者檢討經筵編修史館訖無所遇合儼然布衣耳然自京師及四方之士不問識與不識見其文者莫不稱頌其美則其得之黃公者深矣余間謁公華川上質其所業公不以為不可教引之就學退見予充英妙之氣奕奕文字間未嘗不駭且媿意銳欲追及之其後每見則出其文以示余而亦每不同雍容俯仰如冠冕佩玉周旋堂陛之

上馳騁分布如風雲蛇鳥按兵行陣之間而音節曲折則與黃公如出一律勃乎水涌山立而其進未已也余亟讀之不暇古之君子病無聞焉非有待乎其外也待乎外而聞焉者則君子之不聞者多矣君子之學將以求道而已苟得其道則其見之立言者猶其措諸事業也自吾識子充垂二十年縉紳學者不必才且賢率多就功名以取富貴然不旋踵而摧折身陷死地翦為俘囚者其人徃徃而子充幸而相見固無恙也以其所得

者計之其取諸造物者果孰優乎今子充年壯未艾才氣足以有為天苟使之有位而措諸行事則不敢知由其所得益推而達之古吾見其無不至矣昔汲仲有言千古聖賢相傳之道由斯文而知之後之千古亦將由斯文而知今之道上下千古其人不相及矣必待此而後知其道焉然則吾子充之文不可不傳也以余處其師友之間知之深不自知其言之過揆之於道學術之在吾鄉猶其在天下也吾何嫌而不樂為天下道哉同

郡胡翰序

旃蒙作噩之禊余沿三史事使浙見秘監黃先生西湖
僧舍高第弟子王君子充在焉始相識明年冬詔徵先
生入翰林為學士子充從至京時得陪緒論又明年余
奔祖喪暨還燕而先生懸車告老子充且亦南歸矣深
以不得承教為恨又數年浮海過上虞會林供奉希元
詢及浙水東人物希元稱子充之美不絕口且曰子充
之文黃先生之文也余驅馳王事不遑細論乃今得子

充文集而讀之其材贍其學博其識正凜然有良史風
擬左氏史遷諸文辭之璆琳琅玕大玉夷玉襍然陳之
于前識者知為至寶終莫敢優劣也他所著述皆溫潤
典雅成一家言攷其源委雖本之先生而超出乎規矩
之外者蓋深造自得之矣希元以與先生之文並觀余
謂駕宋軼唐轡西漢先秦而駸駸乎三代也先生在朝
罕所接納惟危君大朴傅君子通得相講貫二君之文
余歸田後不能知其所至卓然可傳於世子充一人而

已子充靜重篤厚謙恭自持其交於人久而彌敬其敏
於學不耻下問所謂有德有言者於是乎見之矣余少
也持未成之學漫仕以干祿玩愒歲月老而無聞敲瓦
缶於黃鐘之餘操斤斧於公輸子之側嘗不知耻於是
乎書廬陵胡行簡序

王忠文後集原序

文者精醇之器也惟其醇而精則有非粗駁之流所能致者然謂其為精且醇焉何也近取諸身內而五藏外而百骸榮衛之迴連經絡之纏束各有所管攝而相為流通遠取諸物則夫一草木之微自根而榦自榦以達於柯而葉始敷焉人見其若離披而不屬也細而察之雖一脉縷之微皆有所附麗而無自外至者此其故何哉形真而體完也世之為文者多如牛毛而麟角未之

或見者有若美丈夫然眉目如畫而貼牛耳以為司聽
貞栢蒼寒方不可狎玩乃綴芍藥翹于枝顛非惟弗之
類縱炮鸞以為膠而欲其聯繫尚可得耶論文至此雖
若甚易而實為至難其能無愧於斯者惟烏傷王君子
充之為然乎子充少濂一十二歲頗觀其幼時所為文
幅程廣而運化弘光燄奕奕起諸公間譬之構厦屋者
揣材甚夥而基緒亦以廣矣及齒踰弱齡輒出游浙東
西復渡江涉淮歷齊魯之墟至燕代而休焉所見喬嶽

長河摩日月而盪雲烟精神翕然與之冥會故其為文
波浪湧而魚龍張風霆流而雨雹集五采競明而十日
並照譬之臺閣已建楹礎駢列觚稜高騫而氣象益以
沉雄薦紳之徒咸以為不可企仰而子克自視則猶歛
然也於是退藏重山密林中愈沉酣於古而密體於方
今凡天人之理性命之奧皆肆其玄覽而養厥靈淳其
學遂底于成而年亦已踰四十矣故其為文渾然天成
而條理弗爽使人挹之而逾深味之而弗竭其平日華

綺豪放之習至是刊落殆盡譬之堂祀嚴邃左俎豆而
右瑟琴鴻生鉅夫冠冕佩玉雍容揖遜於其間而閭巷
布韋之士欲望其餘光有不可得非其一而弗二密而
不繁而造夫精醇之域者其孰能與於此哉烏傷有四
君子曰喻叔奇何茂恭陳德先喻季直皆以文鳴于近
代蔚茂汪洋固不可涯濞若以子充廁於其中濂未知
其孰為之先而孰為之後非深知子充者鮮不以斯言
為過情也如濂不敏與子充同受業黃文獻公之門亦

嘗有志於文辭海內作者無不得觀之每讀子充之文
獨心醉神融若飲醇酎子充亦以濂為知己俾序後集
之首簡昔者雷雅州嗜老泉蘓公之文以為天下奇才
且欲麋珠蘊芝躬執七箸而飯其腹中恐為他饋之所
傷也濂之愛子充揆於雅州蓋有過無不及焉者序欲
不作可乎雖筆意荒弱無所發明安知無雅州者興緣
斯序而求子充之文不但以濂為知言而其愛護子充
者要當無所不用其情也金華宋濂序

夫聖人遠矣後世於聖人之道猶有知焉則由六經之作其所以載夫道者以言為之舟車也言行道由行焉所繫不已重乎道至於聖人矣猶不能無言而况君子乎是故學於道而有得焉修辭以惠後之學者其言雖未至於經其意則不悖於聖人矣蓋道也者妙而不可見者也與其得於心人無得而見焉孰若言以傳之已有得也人亦有聞故古君子一是皆以立言為事豈非成已成物之一端歟自宋南渡以來尚論學術之懿未

有過於吾婺者也上下數百年作者往禪來續至于今
而華川王先生出焉先生以絕人之資承家傳之舊而
與侍講黃文獻公居同里游其門最久心傳指授悉得
其蘊奧且山林之日長考索之精造詣之深尤非諸人
所能及故發而為文溫溫乎其純雅恢恢乎其恠辨秩
秩乎其密察也而要其歸無不本於經者可謂有德有
言之君子非歟文為華川集前後各十卷前集胡君翰既
序以傳先生復俾伯衡序之于後伯衡少先生八歲蚤

又不能忘情於科目訓詁箋註名物度數是講是肄以
追世好殆二十年後屬志於古學又不得碩師造就之
視先生之風有譽於斯文起敬起愧之不暇尚何能贊
一辭哉雖然窮鄉晚進仰望先生之風采而莫之見也
想聞先生之議論而莫之及也得覩其言語文章以觀
其志之所存學之所至道之所成庶幾有所啓迪焉此
固先生立言之微意也傳曰誦其詩讀其書不知其人
可乎然則求知先生者夫亦徵諸其文而已矣眉山蘇

伯衡序

欽定四庫全書

王忠文集卷一

明 王禕 撰

賦

思親賦

天台陳君敬初幼孤事母盡孝壯歲遠遊所寓之室因
名曰白雲著思親也吾內翰黃先生既為作白雲之辭
同門友王禕復造斯賦焉賦曰仰蒼旻之冥漠運玄

化之渾淪何賦授之殊致或偏頗而不均撫予身之薄
祐慨此生之多屯豈造物之見靳將受命之匪辰歲越
在乎稚齡條棄捐乎嚴君曾志學之未逮已過庭而無
聞寄眇眇之弱植托微微之孤根灑血淚於枯柏結哀
號於愁雲痛蓼莪之既深幸菽水之可樂調旨甘於滌
瀟糝餘粒於藜藿躋積雪而筍生斲層冰而鱗躍奉慈
訓之溫恭承懿範之柔恪雖罔極之莫忘固終養之有
托急景不息芳年易徂曷致三金曷貴重墟恐令名之

不振使先猷之弗舒奉堂上之明命離膝下之深娛廼
辭故里廼遊名區薦紳是從冠蓋為徒攜麗藻於淮浙
覲清光於皇都朗節矯以遐奮蜚聲韓其旁敷嗟功名
之蹭蹬慨日月之居諸處違離以自適與憂憤而長俱
盼丘園之雨寂睠桑梓之雲腴烝嘗邇其弗逮溫清脩
其久疏豈初服之難返念夙素之已渝感風樹以浩歎
閔燧穀而長吁至若青陽布和縉景騰美風揚柔飈日
轉華晷雖行樂而何歡恨承顏之非邇朱明啟節南薰

奏琴果散嘉實樹腴芳陰枕炎蒸其孰理襟色鬱而莫
任灤露宵零嚴霜晨被坂遠萎蘭隰空摧撻雁哀哀以
翔霄葉蕭蕭而隕地怵此日之苦思激往年之餘涕玄
冥臨御重陰涸寒蕭條徼塞搖落鄉關日韜光而弗耀
川積凍而成乾伊天意之猶慘豈物情之能歡矧予懷
之含瘁固觸景而增酸撫四時之推移靡一息之停緩
年既迫於喜懼日宜較乎長短指白雲之在望緬丹丘
之未遠溯歸風而効誠藉流月以寄款倘微榮之可養

固遠游之焉敢閔干祿以辭親曾為吏而踰險在往哲
其猶然可吾儕之不勉誓至恩之少酬期餘生之無忝
持寸草之微心報春暉於未晚願設祭以報本烏反哺
而効慈彼蠢蠢之細物亦靈明而有知察妙理以彌戚
曠大觀而遐思悵意長而語短聊擘翰以陳詞

葯房賦

浦陽鄭仲舒讀書之室曰葯房友人王禕為之賦蓋美
其好尚之修潔又以寓吾思慕之意云辭曰夫何美

人之練要兮謇好修以為常既昭質之弗虧兮又矯節
之孔彰爰托物以自表兮曰清修之是將滋幽蘭而樹
蕙兮蘭為佩而蕙為纓褰薜荔以為衣兮集芙蓉以為
裳既所服之孔修兮粲芬芬其文章所處欲其芳華兮
又申之以葯房何斯房之結構兮獨以葯而為之薦芳
馨之菲菲兮絢繁飾以陸離文杏煥以成梁兮琢辛夷
而為楣檼木蘭之差差兮枕文藻其紛披繚䟽牖以杜
衡兮扈素壁以江離桂樹鬱其當軒兮陰團團而成帷

敷百草為庭實兮肆把玩乎瓊枝襲芸編以總總兮絙
空桑之朱絲餐繁英與落葉兮飲沆瀣以自怡澹逍遙
以容與兮聊棲遲而偃仰撫榮華之未艾兮睠茲葍以
自況維葍之澤兮所以示昭質之匪飾也維葍之馨兮
所以表姱節之不忒也朝夕處乎斯房兮信修潔之不
忘苟所好之絕俗兮人不知其何傷方世俗之溷濁兮
糅薰蕕而莫質蕭艾蔽乎中野兮施茝薺其盈室彼惡
穢果何物兮亦雜然而充幃衆舍是而尚非兮孰於芳

其能祇何美人之耿介兮乃獨為此度也夫豈傲世以
自異兮亦惟好修之故也委厥美以自棄兮固非其心
之所安也使矯名而無實兮又胡若是拳拳也顧予生
之侘傺兮曾靡求乎安處塊獨守此敝廬兮蓬蒿紛其
環堵雖凝塵之滿席兮情晏然猶冲豫外物一無所徇
兮曰惟德之為馨翼和順之積中兮致英華之外形徒
潔修以自表兮媿非予之所能既好尚有不同兮又孰
揆予之中情幸美人之嬋娟兮夙與予其目成欲相仍

乎斯房兮恐莫堅乎芳盟命靈氛為予筮筮兮靈氛告
予以吉占曰外好雖不同兮實中情之可堅聞斯語以
邑鬱兮恐佳期之遲莫思美人而未見兮悵盤桓而延
佇將何物以結言兮恨衆芳之已萎采芳洲之杜若兮
聊遺予之所思願相從而相羊兮終歲晏以為期慮誓
言之未固兮結微情以成詞

詠歸亭賦

為沈仲說作

夫何若人之耿介兮志與俗其背馳絕紛華之外騖兮

壹冲澹以自怡守忠信以佩服兮被道義之光輝豈修
禊之徒事兮將聖賢以為師瞻笠澤之沃野兮實若人
之所居豈藏修之無所兮有厦屋之渠渠廓間田以開
圃兮俯平川而結廬木參參以繞舍兮水湯湯而循除
爰有亭其新構兮謝雕甍與綺䟽既琴瑟之在前兮亦
左圖而右書來良朋於遠方兮聊於焉而樂娛揭亭名
曰詠歸兮示聖門以為徒仰聖門之多賢兮各負材而
懷器求藝能之孔多兮由剛勇而尚義彼願試於為國

兮蓋同科於政事亦循循以謙讓兮嘗適齊以通使彼
小相之願為兮亦量能以自計迹三子之所志兮徇功
名而規規何點爾之曠達兮獨從容以無為謂我服之
既成兮屬暮春之芳期集冠者及童子兮浴沂水之戲
嬉遂風涼乎舞雩兮同詠歌而乃歸唯所志之若斯兮
斯脫略乎物累弗舍已以從人兮殆春融而蟬蛻倅氣
象於堯舜兮同化工乎天地宜有契於聖心兮亟嘆賞
而興喟念去今踰千載兮孰此志之能承何若人之耿

介兮乃感慕以作興亦見道其庶幾兮匪惟飾乎修名
繼寥寥之絕響兮長詠歌於茲亭日遲遲以載陽兮雲
油油以成雨鳥和鳴以在樹兮魚群躍以在渚任衆情
之變化兮嘉萬彙之樂所撫物我之各適兮肆安居而
逸處彼世俗之溷陘兮囿利名為網羅衆群趨以競進
紛紛遑遑其謂何苟返求乎初服兮亦所得之已多余
張張之無類兮誓蹈道之弗頗微若人吾誰與依兮願
從游以靡他

四言詩

義烏括田詩

并序

至正十年浙東部使者言民役不均繇民田有不實廼
俾屬郡括其實以賦役且命有田者隨其田之所在而
受役真定范侯公琇遂被檄來蒞其事于義烏義烏婺
屬縣而侯實仕衢為錄事衢婺異郡而檄侯者慎重其
事非其人不以諉之也侯蒞事精敏凡所行科條具有
繩墨以故令既下而事易集法既定而民不爭竣事還

衢縣民相與言曰侯之來部使者之命也雖然所以易
弊革奸引公示正使吾富者不敢私其逸而貧者得以
遂其安者侯之惠也侯之惠在吾義烏曷有窮已吾黨
之士苟啗無詩以誦其事將何以表吾感思之意善於
辭者盍聲為詩於是王禕為之詩曰

維縣義烏有腴其田畇畇原隰有阡田則民有稅
入于官歲取幾何石萬三千民之繇役視稅寡多維民
之媮虛實以訛富累千百役僅一加貧或斗升顧同其

科官有臬司視民孔明曰茲富貧弗均弗平宜括其實
使無遁情役以稅差稅由籍徵維事之殷匪才莫支孰
以才稱范侯在衢臬司檄侯侯莫敢違義烏之事俾侯
來尸侯來尸之躬其勞動凡民有田俾其自陳里胥載
覈徂隰徂畛且稽故籍質其偽真鈎隱弗遺增崇弗逾
既括而實迺籍迺圖圖籍既完弗繆弗汙按籍以役庠
高用敷豪民大家繇兼役重單夫寡人獲免於傭富既
弗病貧將終豐民情載愉頌聲泯泯頌聲伊何民役孔

金匱要略卷之八
均匪役之均惟侯之恩侯恩曷忘膏澤我身我身之餘
施及子孫願侯毋行侯行不留豈惟我人人皆徯侯侯
其行矣莫維侯舟我歌我詩以相民謳

婺州新城詩

并序

婺濱谿為城城重築於宋宣和間國朝以來圯壞弗葺
久矣至正十二年中原俶擾南方繹騷江浙省臣豫備
不虞非城郭不可下其事于列郡俾各完其故城浙東
憲司實治於婺屬郡守亟遵行之然後鉅費殷摠其事

者非才猷之優著不足以堪其任乃以諉處州青田縣尹葉侯侯至則合郡守與州縣之長吏定為要束揣厚薄略基址使富民皆來受役庶民則輸錢致助焉城成其周一千四百八十丈高二尋有二尺而廣如之自春三月庀事至秋七月而遂訖工蓋侯材裕識周濟之以威而本之以仁恕故撓是大役事既集而民不病成功速而績可永於久竇之民乃相與告禕曰維是竇城葉侯之宣力至矣今侯且去而其績之在吾竇將與城相

始終予盍作為頌歌推美誦勤以道侯於無窮乎於是
禕不敢辭而為之詩詩曰

頌頌嫫城十里其周昔圮今崇伊誰云謀謀夫雖多材
則匪優憲司有命撝於葉侯侯來自括其政有捷乃頒
役要乃定土法乃稽民籍第其乙甲庶民畢來遐邇爰
發取土于隍取石于岡築之登登鼙鼓載揚侯來戾止
督我巡功載劬厥躬食息靡遑自春徂秋為日几百功
以告成不緩不亟雉堞雲連樓櫓山植既壯既嚴勢乃

維維方役之興民訛孔騰侯曰爾民爾毋卒爭凡今之
為圖爾于寧爾寧爾居其濱于成城既成矣民則具喜
我有室家我有父子昔危莫保今獲攸止匪侯我恩疇
克臻此維古有言民心靡堅可與樂成慮始則難維侯
不疑事以卒完維侯不欺民以卒安至堅者金不朽者
石金石可毀孰載侯績維侯之績有永無斁作此頌詩
用播鄉國

存存齋為沈仲說賦

理有太極至全而純厥分動靜曰為陽陰化育之妙運
行無垠維帝降衷賦于下人凡人之生其稟匪殊匪厚
于聖匪薄于愚是謂成性至善弗渝存而又存乃其本
初道由此出義由此立存之之功彌久不息維其不息
與聖合德與天為一天之牖民亦孔之明如何愚人自
戕其成幸茲哲人日夕戰兢尚克敬哉以無忝爾所生
五言古詩

家居二首

家居華川上及此三百齡老桂蔽後堂長槐列前庭槐
陰夏散綠桂花冬留青重惟根本茂枝葉藉以榮吾先
久種德嘉種乃休徵撫躬良自愛遺蔭庶其承

東隣職胥吏西隣業屠沽酒炙日狼籍錢財肆求需口
體既華飽自謂樂有餘寧知生死間身與糞壤俱鄙人
有遠志屢空非所虞閉門卧風雨窮年理詩書所憂道
未至不得成名譽修名倘樹立千載以為圖

寄贈申屠教諭

學官本閑曹博士非冗職人存政斯舉道在時乃適卓
哉申屠君令聞重珪璧耻隨茂才名羞蹈隱士跡前年
擢鄉書比者承省檄束帶主歛庠橫經擁師席想見百
里間文風變疇昔大音姑小鳴淺蓄那淺測區區抱歆
慕所恨未良覲願言執麟經與子相扣擊他年老韓門
敢用追提籍

贈別高進道赴廣西憲府

舉酒且勿飲請君聽我歌我歌亦激烈君行莫蹉跎聖

主御宸極治道臻泰和文章布海隅玉帛來若阿人生
邁新會鮮不自濯磨痛哭上賈策笑談決韓科經濟一
以展功名良亦多維君瑚璉器貴重含光華持以薦清
廟孰云或偏頗蕭條歲年晏坐使玄髮皤終然棠溪精
百鍊非有他憲府新辟掾簡書起嬋嬰及茲復自傲恐
爾時已過由來九翮鳥猶值一目羅勿謂行路難且對
雙眉蛾桂林歛烟瘴炎海恬風波道塗雖云遠行邁須
逶迤為君陳此詞比贈珊瑚柯

次韻孫道士思仙

我本仙中人所友，皆飛仙。飛仙亦何為，逍遙度遐年。飈輪朝蓬島，羽駕夕藥淵。周游無停蹤，八極及九泉。口咀三危露，手弄五色烟。自從墮塵世，不復肩期佺。念之恍如夢，使我心茫然。何當返初服，凌虛恣孤騫。

贈別李千戶

丈夫生世間，雖死期不朽。寧令七尺軀，泯沒百年後。聖主居九重，太平日云久。勾陳肅羽衛，列象應星斗。柰何

折衝具往往猶掣肘
養空復勤驪黃紛
牝牡徭蠻昔梗化
淮盜近興醜奇策
殊不聞深恩詎堪
負桓桓李將軍仗
節海隅守鐵甲縈
綠膝金符綰朱紐
平生韜略書披繹
長在手智勇未及
宣青萍夜常吼先
生制夷夏武備殊
不苟先事防不虞
威聲驚飛走馬援
革裹尸王罽箭如
首一懷報國志爵
祿隨亦厚雙瓶送
君別行旆依官柳
贈言豈徒為醉擊
秦聲缶

常熟西郊

稻禾歛嘉實蘭蕙摧孤芳華滋日已歇遊子多慨慷林
臯集鳥雀畎畝散牛羊物情各有適心與歸雲翔

金德元西園宴集得第字

旭日散微暄喬林動清吹雖忻氣候佳頗覺衆芳悴朋
簪得稍盡客屐隨所憩華年嗟易徂嘉會况難值開尊
引清觴有酒須盡醉情真略儀飭理會忘物議維予二
三子夙宿諧深契豈無西掖才未擢南宮第淹時姑陸
沉誰云果忘世獨憐飄泊蹤萍蓬渺根蒂未知今日懼

明年復何地

鎮江望京峴山有作

艤舟大江口
矯首峴京山
山色近目睫
洩雲護層巒
吾鄉忠簡公
丘隴在其間
嗚呼靖康亂
九鼎紛播遷
建炎既南狩
國事已艱難
公方任社稷
百戰心力殫
神州將全壁
抗疏請迴轡
大誼表日月
衷言披膽肝
誰歟獨何心
忍使棄中原
星殞孔明死
王業遂偏安
惟留忠誠節
宇宙垂不刊
遺墳托茲土
孰敢樵牧干
客途有程期
無

由拜荆管遺武幸可蹈英風杳難攀天昏白日落淒然
洒清潛

登黃樓

昔讀黃樓賦頗疑過鋪張今晨獲登覽始覺詞致長
懷澶淵決彭城預為防千年文章守恩德在此鄉只今
河為患居人極災傷誰為任民社乃獨循故常山川今
如昔游子多慨慷長風城上來飛雨濕我裳摩挲舊碑
刻欲去重徬徨

贈別咎德明歸省

嗟我逼貧賤束書來京師長懷出門日含悽拜親闈恐
傷慈愛情忍淚不敢揮飄零靡所憫時拂身上衣今晨
與君別令我慘不怡念君富文采炯若珊瑚枝成君未
卒業如何遽言歸謂言非有他重此定省違雖無毛義
檄故有陽城規燕郊涼風動淮甸白雲飛還家造膝下
再拜獻酒卮綵衣舞且飲此樂孰與夷人生適意少處
世多睽離東門送子行薄言歌我辭

十一月七日出南城別陳三檢討

窮冬朔風怒冰霰滿城闐凌晨策我馬言送同心人為
問將安之南轅返江津關河歲已晏胡不少逡巡才高
世所疾時昌命逾屯鸚鵡偶作賦畢方亦遭文天地亦
云廣寧不容子身子窮非我憂道在志須伸所憂犯霜
雪此行多苦辛平生離別淚為子一沾巾相期有後日
去矣復何論

至正庚寅二月十六日同韓秀才發都門南歸

并懷陳檢討

深雲散連陰旭日照畿甸百卉皆華滋青年倏流轉駕
言驅我車南還涉江漢帝鄉非不樂他適豈所願平生
抱區區期結明主眷天關九重深先容孰吾援低徊
出都門顧闕情戀戀行矣徒自傷懷哉又誰怨朋友幸
知己祖道紛繾綣枉被軒冕崇飭此韋布賤墮獲思故
人風流逐時彥出處有素期離合足深歎仰惟聖有訓
學道貴無倦繼茲益自修敢待玄髮變

贈別張舜俞

東南夥租賦富庶稱三吳吳田苦卑下浩渺平江湖
害動連歲官府仍徵需紆餘脂膏地坐見民力枯維時
都水司職任在開疏朝家重民命務使疲瘠蕪選官皆
名卿興利多良圖張君實令器家世習文儒三載為列
掾豈惟承簿書定膺贊畫間利澤能施敷春風二三月
行李赴皇都謂將謁天官序績待新除驅車指河朔
還涉徐濟墟洪河久為患黔黎幾成魚比聞用羣議極

力事防虞兵民十數萬官吏千百俱累月始就緒國費
寧無虛雖云幸平復焉知久何如水利子所習識見元
非迂餘策湏上獻庶以裨廟謨鄙人處畎畝夙昔懷區
區世故屬可歎贈言匪勤渠

贈別彭仲愈分得水字

平生喜求友結托盡名士英游非不多落落鮮知己夫
君文章伯問學富經史大器湏晚成至寶不輕市相逢
吳會間論議發蒙鄙未會神先交遽別情曷已蕭條歲

金匱要略卷一
卷一
云徂飛雪遍千里江寒蟄魚龍路遠積烟水離異未足
嗟合并寧可擬獨懷同門朋為我謝屠子

友怡齋為東陽蔣伯康賦

鴻鴈動成序脊令長在原物情各有知人獨無弟昆弟
昆本一氣至愛心所根世媮俗云薄天性幾不存伐樹
亦何恤閭牆或為冤昭哉聖有訓有耳如無聞東陽望
蔣氏詩禮遺子孫昆弟篤友愛怡怡若春溫我觀友怡
訓為爾陳此言匪為蔣氏歌庶使薄俗敦

吳門贈凌秀才

我家華川上君住蘭江濱
百里通一水搃是金華人
自我與君別三載幽燕住
及此會吳門朱顏各如故
同為異鄉客誼重情依依
東風足攜手君何復言歸
歸去金華山日看好山色
紫翠集芙蓉綠草眠白石
若逢牧羊子為我寄深情
莫令猿鶴怨行矣尋初盟

感興四首

清夜耿不寐仰看天象移
天非有形體實乃列宿為
列

宿附天轉五星自參差日月復自行晝夜互東西三者不相謀各各無停機坐使歲年邁令人嗟老衰

婦工務蠶桑農力勤稼穡人理此其本庶用給衣食丈夫生事疏壯大轉窮阨積學復積文將以代耕織藝成無所售撫卷空太息千載尚可期豈憂寒饑逼

秋風戰庭樹落葉如敗兵觸目感時艱油然百憂生四方晏安久一旦災禍興干戈半天下積骸比丘陵天子仁如堯夙宵念蒼生無乃訐謨者法度徒紛更致茲豈

無由何時復承平
嫠婦不卹緯智士若為情

女貧適人難士窮事人易
堂堂七尺軀道義非不貴孰
知一失身祿爵反為累
由來食人食有死心弗替出門
慎其隨大易著深義所以古達人
隱約居亂世我懷管
幼安高風邈難繼

飲橫城蔣氏別墅

春華被衆卉巨細皆敷榮
牡丹既舒葩荼蘼亦含英
撫物惜芳景開筵暢塵縈
時從石邊坐或復池上行
繁

金匱要略卷一
轉侵袖垂條動鉤纓心會言屢忘理愜感忽生游魚何
洋洋鳴禽自嚶嚶悠哉行樂意契彼禽魚情

偶作

人言青雲路欲登元有梯古來功名士極力事攀躋我
身亦兩足我馬亦四蹄如何十年走猶復迷東西乃知
既得意青雲偶追隨寄語山人好同白雲棲

贈徐生

丈夫貴問學有學身乃尊聖賢炳謨訓方冊幸具存求

之非有他所在用力勤譬如山水其出初有源盈科
方浩浩遂作波濤翻又如玉在璞莫辨珉與璠雕琢既
成器乎尹爛煇煇人身本一物不學復奚論學成自見
用不必事趨奔上焉為國華下以大其門我觀膏粱子
志氣亦軒軒尋芳紫陌曉買笑青樓昏年少誠足樂面
墻將何言徐生英俊姿家世襲衣冠結髮事書史終年
不窺園螢囊暑夕照蠹簡霜晨繙及茲種植立豈不培
本根一朝功名至看爾高飛騫我言厚勸子願子心毋

謖

錢唐贈別姚卿

仲春苦淫雨，彌月不停滴。時時雷電交，俄復飛霰積。漂雲甫開霽，陽精仍剝蝕。二氣豈錯行，人心轉惶惑。維時錢唐上，屬子有行役。謂言將何之，去作金華客。已脫郡曹羈，姑從憲府辟。金華實吾鄉，比歲羅困厄。前年理城隍，軍需更徵索。斯民竭脂髓，誅求殊未極。凶荒乃相繼，斗粟無所糴。紛紛田間農，往往溝中瘠。只今隣境間，從

橫猶盜賊相望警烽燧道路動榛棘誰歟司民命豈不
懷怵惕不然遭數乖振救果無策風憲耳目司號令易
闔闕况君有長材足以資贊畫行聞疲瘵甦旋被撫摩
力往哉勿躊躇及物事須亟冥冥江花紅杳杳關樹黑
歌我危苦辭壯子行邁色功名貴自致奮發須有激獨
憐飄泊蹤仰羨冥飛翼

十二月二十一日同堵無傲朱伯言郭公葵過
西湖至南屏山明日予將渡江東歸賦此留別

北風有餘淒衆卉無留芬寥寥湖山際清游接歡欣嗟
我二三子平生歷多辛天道諒非遠如何久遭迍幸茲
稍憩息頗覺忘超奔感今長慨憤道舊鬱懷伸世情日
已變友誼古所敦歲晏各自愛毋徒惜臨分

陳元禮太常以使事至錢唐三月十七日堵無
傲陳君從朱伯言陶中立韓與玉諸公西湖同泛
分韻得氣字

錢唐積雨餘景物散春媚時暉被原隰遠映皇華使良

晤愜久睽新情諧曩契朋儔集芳宴舉酒迭相慰念昔
天子都與君久留滯夜眠每連牀晨出時並轡愛深均
骨肉往往佩高誼別離未多年升沉遽殊勢頌臺司禮
樂子職亦云貴况乃銜君命光采增意氣騫騰誠足多
會合初不易清歌送窈窕畫舫蕩空翠庶洽平生歡聊
盡今日醉持觴且徘徊臨風復獻歎

陳元禮奉詔徵彭處士於崇安却歸永嘉省親
還京師撫事感時因集杜少陵詩四十韻奉贈

南風作秋聲蒼茫雲霧浮客子中夜發烏啼滿城頭長
嘯宇宙間維時遭艱虞兵戈滿邊徼中原有驅除天未
厭戎馬積屍草木腥原野轉蕭瑟青山猶哭聲紆餘膏
脂地連雲列戰格園廬但蒿藜何由似乎昔貴人豈不
仁不似問瘡痍萬里煩供給上官督有司誅求何多門
出師亦多門借問大將誰不獨卿相尊羣盜何淹留慘
淡壯士志激烈思時康銷兵鑄農器聖心頗虛佇經緯
固密勿豈在多殺傷實欲邦國活子負經濟才久在王

候間文彩珊瑚鉤正直朱絲絃帝曰大布衣使者來顏
闔實籍長久計時議歸前列詔從三殿出嚴程到湏早
征塗乃侵星挂席窮海島名賢慎出處終媿巢與由未
達善一身潛魚不銜鉤故鄉有弟妹家貧仰母慈倚門
固有望遠道素書稀家鄉既盪盡游子去日長人事多
錯迂不如早還鄉翳翳桑榆日白日照執袂超然歡笑
同相對如夢寐堂上會親戚久念與存忘三日共一筵
一舉累十觴無乃太匆忙今年又北歸浩蕩想幽薊公

家有程期世故莽相仍豈無濟時策賢豪贊經綸天
子正前席勿為新婚念平生感意氣努力輸肝膽騫騰
坐可致鄙人奉末眷別離已五年逍遙展良覲不敢墜
周旋送子清秋暮含悽向寥廓不得相追隨居然成護
落艱難媿深情生別常惻惻有使即寄書慰我深相憶
贈別陳希文北上

自予別京華荏苒經五載蕭條山林蹤時論寧復采命
蹇嗟事違藝微轉身急空懷戀關心釣天夢猶每茲晨

送君行感慨覺殊倍羨君英邁安早歲志湖海俊辭何
鏗鏗偉氣真磊磊平生經濟策欲以獻君宰屬時構艱
難四郊尚多壘趙國仰魯連燕昭師郭隗是事古則然
于今豈無待君行勿躊躇玄髮容易改壯士須特達鄙
人愧庸猥昔年舊交游零落知誰在音書久間闊迂慢
豈予罪雲泥既遼絕道路仍蟲豸臨歧離別淚那忍為
君灑

贈陳憲史之福建

夫君英妙姿家世聯仕籍弱齡濟烏臺所掌在文墨致
身已青雲騰譽如白璧序勞合優遷隨牒更遠役七閩
處南陲憲府堂堂闢君往試所長俯就列曹職相逢錢
唐濱秋風動行色嗟茲邁時艱天地滿兵革嗚呼凋瘵
毗何乃際斯危生者困科差死者墮鋒鏑貴人豈不仁
胡不懷慘惻我觀得意者及是翻取適旌旗出廣路百
步人辟易假威濟誅求生事微玉帛高堂日置酒秉燭
燕賓客芳除紅錦藉珍饈青紗幕嬌歌絕艷舞女婦擁

前席垂酣不上馬歡樂未知極寧思公餽傾便受素餐
責維時風紀司厥職務糾擊矧今慎掄選充位皆名德
願君勉贊襄要使去淫慝及物摠至情匡時展良策願
予狂者流撫事常感激平生賈生志臨別長太息

紫雲山房為王景周賦

華房敞虛明繡櫳聯綺疏皓月粲瓊戶迴飈揚流蘇其
中棲祥雲淡蕩紛紆餘非卿亦非雋紫色爍以數亭亭
忽為蓋藹藹或成圖縹縹映白鶴依依覆丹爐房中居

者誰高標列仙臞春晨禮太乙秋夕朝玄虛非無長年
術亦有養生書逍遙度人世與天以為徒何當寄幽蹤
謝此紅塵區

贈別黃仲恭同知之官餘姚

錦衣映朝日道路促征鞍舜江水如鑑待君照容顏還
從得意處應念作官難

七月八日同李高渡江東歸述懷分得龕字

蚤年志湖海嘉遯非所甘驅車燕趙北弭節吳越南李

子誇遠適虞卿勞負僭謂將風翱翔詎能輟鱗淹蹉跎
歲云壯頗覺世事諳致君術豈謬枉已意已慙乃知免
株守殊勝虎穴探遭時兵革興江淮戰方酣日夜羽書
急列城俱戒嚴况茲錢唐俗險惡人何堪千錢購斗粟
累日食無鹽吾徒事文翰不解從戎驂客囊更羞澁愧
乏黃金兼歸歟豈不樂何待霜露沾長揖別英游明發
張雲帆同行藉佳彥高誼中心銜依依共蔬食霭霭接
叢談長路頓藍輿涼颼浮葛衫原田畢新穫村釀如蜜

金
卷一
甜顧惟出處意幸子同酸鹹子家峴山陽第宅深潭潭
藏書故可讀一一懸牙籤稍須襍吾被相從坐山龕世
故易翻覆人情劇寒炎殷勤亦何屬寶爾筆鋒銛

舟中口號

挽舟上逆水欲進不得前丈夫得意日何異下灘船

秋夜雙溪上對月懷故人

秋氣日以肅秋夜日以長蕭然清溪上對此明月光月
雖照我身豈能知我心我心亦何為所思在所欽嗟君

玉雪姿與我同心期此月若照君君能不予思

感懷示城中一二同志

飛颺滌煩鬱散策步廣庭明月流素采照我六尺形稍
欣羣動息忽覺衆感并結髮事文翰夙志在功名庶將
為國華亦復致親榮所望則已淺況乃不得成屬時遽
右武四海干戈興賈誼策豈迂劉蕡第弗登悠悠年運
徂促促世故嬰伏枕勅中夜撫躬慨平生垂名有千載
享壽無百齡嗟哉身外事孰重孰為輕惟當托名山理

此羣聖經後聖倘可俟吾言庶其徵

九月廿三日同德基宿城西王莊敏公故宅有

作

長塘散寒菱老屋陰喬木百年文獻家同此清夜宿食
非為盤飧意在窺簡牘弄翰既紛紜抽辭亦芳馥論深
理何玄情浹誼彌篤前修未寥寥勗哉繼遺躅

真憲使持節閩中過蘭溪有詩留別次韻

風渠儀禁署詞華照儒林暫持閩部節寧忘魏關心薰

風蘭江上弭櫂舒煩衿念此違離遽徒令馳戀深頗聞
議環召當宁有俞音行膺紫泥詔旋獻丹宸歲不才託
末契終當侍華簪

十一月五日重登南溪蔣氏懷遠亭

石逕融積霜桐簷散霏烟良辰攜佳友登覽思悠然青
山如故人歷歷揖我前獨憐亭前松歲晚含清妍昔至
始過滕今來已齊肩撫物動深慨人生無百年浮華易
衰謝流序倏徂遷不朽或可託吾將企前賢

乙未歲家居不出偶讀淵明詩因集其句為一

首曰歸田園

丈夫志四海驅役無停息榮華難久居歲月相催逼縱
浪大化中人生不滿百時駛不可稽前途漸就窄吾生
行歸休營已良有極念念動中懷行行向不惑守拙歸
園田貧居安稼穡司田眷有秋苗生滿阡陌幽蘭生前
庭灌木荒余宅閉門不復出何嘗失顯默時還讀我書
抗言譚在昔窮通靡攸慮我心固匪石濁酒聊可恃素

衿不可易懷此貞秀姿諒哉宜霜柏

贈別王季野判官入閩兼柬其弟季畊照磨

維王望閩中載德今奕世堂堂忠愍公致身當宋季道
學承紫陽名位埒真魏忠愍實猶子全閩屬制置天兵
既南征奉籍來附隸世皇重嘉歎仍託七閩寄嗟哉
日本役遺忠更昭晰是生清獻公皦皦公輔器髫年擢
縣宰弱歲膺閫貳駁歷叅大藩率用儒飭吏廉名貴華
皓重望壓同異英英羣公子金昆聯玉季維君美無度

梧竹含標致詞華丹鳳毛宦業皂鵬翅譬如崑山玉不
琢自純粹又如古干將芒采不可閱自餘諸伯仲家業
俱善繼僑居吳中久門閥擅崇貴良田與美宅先帝
之所賜忽時遭艱危干戈遍天地吳城甲江左曾是一
朝棄嗟君脫虎口老幼得攜累錢唐及金華亦是少安
憩世塗仍多虞更作入閩計喜茲新命放拔擢南劍倅
南劍介閩關忠愍所嘗治詎期未百年乃覩拜廳事頗
聞故里間丘壟多蕪廢畫錦人所誇行矣毋濡滯念昔

陪英游十載托深契時方樂承平南吳北燕薊春嬉並
游鞭夜宴接歌袂時時發吟咏倡和忘夢寐茲樂豈復
得臨風起歔歔黃塵障赤日驛道千里逝願言寶爾軀
遠大自今始慷慨丈夫懷淒惻兒女淚贈篇覺詞繁庶
用為君慰

采芙蓉次韻答友人

秋江芙蓉花豈不顏色好日夕霜露侵其柰容易老花
老不自知猶謂色無改愛花惟愛色莫恨人不采涉江

采芙蓉莫采芙蓉蕊蕊開猶耐久留以映秋水妾家江
水南君住江水北采花以寄君聊慰相思憶

哭蔣季高

丁酉七月初予作會稽客有人東陽來踏戶遺書尺計
音季高氏死矣就窀穸初聞意渾迷旋叩氣愈塞此事
豈有無此理誠叵測嗟嗟吾季高稟賦甚殊特短小精
悍姿英邁不可抑沉潛理義窟畢志究經籍緒餘乃外
發文辭舒蘊積粲然春葩敷湧若秋濤激翱翔薦紳間

聲譽比主璧淵源本家傳法度由師得庶培遠大業用
趾綿衍澤人望嗟則然天道慨何極華年未三十天奪
無乃亟譬如千里駒竟斃鹽車厄又如荆山璞砉碎樵
斧擊此寃孰從訴此痛果難息念昔與子交寒暑將十
易子少吾所畏我長子所敵大誼相切劘微辭共探剔
異姓諸弟昆深交契金石杖屨華川晨燈火南溪夕從
容見古道歲晏期靡忒薰風端陽節別子雙峴側臨歧
亦何言彼此慎愛惜豈期兩月別遽作千古隔雲深山

水遙日落關塞黑夢中欲見子精爽無處覓風塵屬浩
蕩天地方逼仄會歸執杯酒酌子泉下魄遡風一長慟
洒淚滿胸臆

送宣十判官之平陽

疾風卷原野寒氣襲重裳送君茲晨別之官適平陽羨
君卓犖才本是青雲器英華映詞林相府早從事得官
髮已白無乃與願違庶推夙昔志出身匡時危不觀今
公卿徒然享豐祿視民如仇讐旋亦覆公餗維溫實名

郡平陽溫屬州其州經甲兵井邑成荒丘匪君才有餘
曷往濟危急諒哉忠厚心及是湏澤物君行到州境正
及霜柑時豈惟有嘉政定復多新詩惜君念君行臨別
情繾綣願言益自勗修已在無倦

至正戊戌三月卜居青岩與同志分得行字

窮年困塵市愛此山中行出郊步稍遠入林懷已清天
地正逼仄歲月方崢嶸卜居樂深境敘迹逃浮榮久矣
采薇曲非歟浣花名肥遁豈初志冥棲亦真情貯諧桂

松契敢負猿鶴盟
沉茲雙澗水可以濯吾纓
歲晏倘可託於焉寄平生

偕宋景濂戴叔能陪蔡士安韓思學游月泉書

院得矣字

良晨盍華簪出郊餘二里
精廬尋月泉散策稍游止
吾邦宋鉅儒厥有吕夫子
淵源自濂洛述作偕經史
維時考亭翁志合道尤似
律吕相倡宣規矩互模擬
傳緒斯有歸正學固如此
茲土昔過化百世崇明祀
餘思猶藹藹

然盛德非遠矣後生抱區區結髮蹈先軌今游雖云樂
車馬謝繁靡望遠登高丘臨幽玩清泚仰惟古人意豈
敢肆娛憇仙華翠如削引領足頻跂

次韻奉答林彥文參謀

西風戒郊原百穀歛嘉秀屬茲樂豐登乃爾亂離邁使
節辱東臨敝邑素云陋驚心劇盜逼觸目編氓疾匪資
經營功世故孰匡捄鄙生非時湏閉戶守迎迓遯迹懷
樊英著書擬劉晝布衣倘非窮吾將謝文繡

次韻友人山居秋日就述鄙懷八首

月出東嶺光風來西樹聲秋景倏然異令人心意驚
君子有所蘊不時終不鳴獨怜青鏡中白髮日夜生

白髮容易生况復聞秋砧觸物動深感感此歲月深
子期詎堪鑄舉世誰知音取琴為君彈請彈梁甫吟

梁甫不可追何由繼華躅永懷古達人未易食人粟
寧將七尺軀甘爾隱屠牧誰持明月珠却向窮途哭

明珠有照乘其焰百尺長如何汙塗泥世人不得將
終

然有時出奪月爭夜光至寶非可私獻之天子傍

憶昔天子都三載竟忘歸謂將拾功名所志非輕肥翻
然忽自悔自售古所譏歸來山中居坐看雙輪飛

山居亦何樂所樂在泉石盤桓撫松桂茲樂豈易得白
雲如飛鴻過眼時歷歷俯仰天地間孤蹤寄幽僻

幽僻青岩中結屋開荒畦羣山列左右雙澗鳴東西蕭
然守岑寂環堵蓬蒿齊兵戈徧天地吾將託冥棲

天下兵未息何當騁予懷富貴非可待少壯豈重來百

年亦偶爾千載真悠哉惟應抱遺經獨立山岩隈

鳳林鄉乃王氏初遷之地子孫散處既久至正
戊戌兵戈擾攘余至鳳林訪諸宗族為避地
之計因賦詩見意示子姓云

鳳林縣南鄙山僻田衍腴維嫠望王氏吾祖始所居子
孫既散處往往鄉相都綿延四百載餘裔猶紛敷懸知
本根茂枝葉自扶疎我家縣隅北去此兩舍塗避地乃
此來屬時正艱虞所來為宗族豈以勢利趨羣從相溫

存思意何厖渠謂言貸我粟亦復假我廬而我懶生事
俯仰缺所需未應造物者困此七尺軀矍屈本求伸免
藏非過圖重維首丘義詎敢昧厥初尚思朝陽鳴瑞世
諧貞符

禠詩十首

古人不可見古月還至今每因古時月得見古人心月
即有圓缺心非有存沒將心與月比光明祇如一

一日復一日一月復一月坐看明鏡中顏色曉夜別日

夜不我與少壯能幾時寸陰倘不惜後悔將安追

天地最鉅物人身實至微身焉不自尊曷以配兩儀仰
惟古聖賢充實有光輝因憐蠢蠢徒鳥獸安須縻

讀書雖窮經學道在窮仁經通乃知至仁得斯成人束
髮吾有志辛苦今十春朝聞可夕死誰當負斯文

燈殘花猶結木爛菌方采物既就凋零秀氣終有在惟
人最靈明慎勿輕自待堂堂七尺軀不朽可千載

腐草幻熠燿光燄終不遐雀入水為蛤乃更混泥沙根

器本如此變化亦復爾不聞北溟鯨一舉三千里

鳳皇無竹食無以充朝飢麒麟遇豷夫乃比麋與麋君
子負道德不遇將奚為所以魯中叟終身竟栖栖

人情本多欲外物相牽攻富貴恨不早功名恨難崇孰
知二物者轉盼春華空君看燈上蛾何以保其終

南園種藜莧北苑藝瓜薑食蔬豈不美淡薄味孔長如
何元相國胡椒積盈倉終然襪塞口徒死可憐傷

山枯因產玉川竭緣孕珠珠玉到人間禍胎不可除脫

粟足為飯裂布足為襦吾寧謝華好朴素以為娛

雜賦七首

大化莽冥冥曜靈無停候往古復來今吾往渺何究無
始在我前無窮在我後其間僅閱世曾不百年久百年
亦頃刻彭聃詎云壽悲哉浮休身不及道傍堠不學劉
伯倫陶然付杯酒

窈窕青樓人二八多嬌艷朝朝明鏡中芙蓉嬌生面春
花紅艷殘綠葉秋容變白髮日夜生衰莫如轉盼所以

學仙人形神每精鍊吸景制顏齡長生九骨換

萬物何總總錯糅兩儀間人身亦一物於何較姪妍古
人有不朽身後貴名傳鴻勲勒惇史與學在崇編託茲
以名世庶用垂不刊孰知竹帛壽不似金石堅夙予秉
微尚外慕俱棄捐獨持方寸心千載明月懸

驅車適秦京策馬來燕國所見何堂堂莫非侯與伯甲
第金張家乙觀王謝宅旌節出廣衢百步人辟易威權
自其口氣焰何烜赫安知公餽傾反掌遂狼藉魯連彼

何人肆志寧自適

梧桐生巖陽下俯清澗潄柯葉雨露滋鳳凰宿其陰稟
材一何良裁作綠綺琴被以弦朱絲綴以徽黃金澹然
三尺中實涵太古心唐虞世已遠末代崇哇淫匪無南
風曲欲鼓孰知音

終朝飲醇酒舉杯易成醉終日讀古書撫卷不成寐義
理亦何深歲月一何駛功名實外物山林乃無事昨夜
西山雲秋雨生爽氣笑指二尺檠終當勿相棄

門前兩松樹千尺何青青白雲枝間宿縹緲姿態生驚
飈來吹拂復作笙竽聲物情豈有遙偶爾相合并須臾
遂分散彼此各無情因之感世故超然欲忘形

夜坐擬古二首

新月如弓彎流星如箭長惜哉弓不弦况乃箭無銚借
問羽林軍何以射天狼

織女居河西河東住牽牛奈此一水隔數會曾無由精
衛勿填海為我填河流

三韻三篇

巨鳥有六翮大魚有重鬐回翔棲鄧林噴薄遊天池終
焉觸罔罟性命不自持

曲曲溪流東折復西轉潭底一何深灘面一何淺人
心亦復然何從測夷險

青天青如石衆星聚光芒牽牛望織女廐馭王良誰
其挽弧矢為我射天狼

次韻劉先生古詩十首

元氣播羣彙雨露均沾濡洪纖各生成孰為垂與除物
形自有偏造化無遺餘大道亦如是聖域同所徂譬如
挹樽酒置彼四達衢飲者隨爾量初何間親疎人身叅
三才盍思居廣居

我居固云廣我力敢不勤結髮爰有事外物視浮雲分
陰深所惜矻矻窮朝曛孰謂參也魯一貫乃獨聞望道
吾未見憂來心如熏彼哉夸毗子方將樹功勲

勲名既以高禍患隨以至軒冕等桎梏古來同此事象

金野史卷之二
齒及翠毛茲身適為累咄哉若而人生死如夢醉古人
吾焉從欲往無兩翅

有翅亦安之且學斥鷃雛栖遲一室間究觀古人書誰
云古人遠朝夕同我居其言有若此其心定何如見心
不見面令人發長吁

人心如人面觀人所宜慎古人心坦夷改過豈嘗吝今
人心險艱筆鋒作刀刃古今人不同光景同一瞬置此
勿多談且復談世運

世運有汙隆代謝由一氣人身囿其中草木共榮悴奈
何桃李花顏色圖久媚所以特達人每灑英雄淚百年
未足憑千載當可覲

所覲身後名遺芬比猗蘭身焉匪金石詎傲霜雪寒不
朽苟有託年歲任其闌朝聞夕可死用力非無端心至
力靡逮撫膺徒慨嘆

慨嘆將何為願言啟茅塞先生括蒼彥長髯漆光黑平
生守勁節枉直較尋尺著書三萬言石室豈寥寂還攜

青藜杖來作朱履客不才託末契承訓庶朝夕

朝夕操鉛刀而以親龍淵銳鈍固遼絕物類幸相連斯
文如一綫蕭條今可憐孰其任茲事迴瀾漲百川念之
心皇皇中宵不能眠

不眠亦何如如醉不能醒幡然披衣起仰視青天青驚
飈戒高林踈雨過廣庭秋意殊可攬河漢方西傾徘徊
復徘徊誰歟領茲情


性初余同門友也至正初定交錢唐及茲兩紀

中間出處離合之不同有足慨者頃辱以先
師黃文獻公所贈詩見示感今念昔撫卷泣
然因用次韻追和雖辭不能工而師生之誼
庶幾見之矣

憶昔與子游我齒始踰冠子年頗少我已復飽經傳白
璧信少雙明珠合同穿吾師文獻公清慎寡推薦而獨
敬愛子揄揚儕衆彥庶將托斯文豈特誇詞翰緬思韓
公門至者凡骨換其時籍湜輩抱璞爭自獻何言百世

下徽猷乃重見寥寥古道遠忽忽陳迹幻我時事遠遊
歷攬天下半三年客幽燕坐使黃金散却歸巖穴底還
覓青精飯惟子負奇才年長氣逾悍不受世鞅羈歸釣
東海岫誓終究遺經世累忘貴賤蛟鱈者何為騰湧起
清旦誰云屠龍手祇解挾書卷揮劍剗其髻腥雨灑流
汗終然雖裂背竟爾成解腕遠害圖全身有足奔走健
自茲十年來宇內皆糜爛我猶跼故園子乃處遐甸蹤
跡無由聞頗類弦離箭及是重盍簪各詫經喪亂故業

共討論殊覺賢否判子才雲錦機組織五色線待詔金
鑾坡講經白虎觀此事誠所優吾將迫衰晏遡風一泣
然徒有情緒緒



王忠文集卷一